

**Tɔnɔ kɔlɔ**  
**ZAN**  
**na pɔpɔni o ki bile tin**  
**Tɔnɔ kɔlɔ Zan na pɔpɔni o**  
**ki bile tin na bri dɔbam kɔlɔ**  
**tin mu tuntu**

Zan daa ta mu pɔpɔni tɔnɔ kuntu o pa Zezi kɔgɔ kum jɔgɔ dɔdɔa ni o na bɛ-ku ni nu di o biɛ tin.

O kwe-ba si ba taa ŋwi cɔga wɔni si ba daari ba taa soe daani mu. O ma ta kwɛri o kaani-ba si ba ci ba titi di vwan zaasum tiinɛ bam.

<sup>1</sup> Amu wɔlɔ na yi Zezi kɔgɔ kum nakwi tin mu pɔpɔni tɔnɔ kuntu a pa dɔbam nu wɔlɔ Wɛ na kuri tin, di biɛ balɔ na wɔ nmu kɔgɔ kum wɔni tin.

A soe abam cɔga cɔga. Ku nan dai amu yɔrani mu soe abam, ku yi di balɔ maama na lwarɔ Wɛ cɔga kam tin di mu. <sup>2</sup> Bɛŋwaanɔ dɔbam maama sɛ Wɛ cɔga kam, yi ka daa bá fɔgi ka ti dɔbam tee ni.

<sup>3</sup> Dí Ko Wɛ di DI Bu Zezi Kriɔ wó pa dɔbam yazurɛ di yu-yonɔ, yi DI daari DI duri dí ŋwanɔ, dɔbam balɔ na sɛ Wɛ cɔga kam yi dí soe daani tin.

*Cɔga di sono taani*

<sup>4</sup> Amu wɔ poli lanyɔrani di a na lwarɔ ni nmu biɛ bam badaara tɔgi cɔga cwɛŋɔ kam, nɔnɛni dɔbam Ko Wɛ na pɛ dɔbam ni si dí taá ki te tin.

<sup>5</sup> A nu, a lagɔ a ta di nmu si dí maama manɔ si dí

taá soe daanı. A na pɔpɔni kɔlɔ tɪn dai ni-dɔuri, kɔ maŋi kɔ yi Wɛ ni dɪm dí na ni pulim ni tɪn mu. <sup>6</sup> Dí na wó ta soe daanı te tɪn mu yi sɪ dí taá ŋwi ni Wɛ niə yam na bri te tɪn. Wɛ ni dɪm nan yi sɪ á taá tɔgi sono cwəŋə mu. Abam nan maŋi á lwarɪ Dɪ ni dɪm kɔntɔ pulim ni mu.

<sup>7</sup> Vwa-nyina zanzan mu tu ba kari lɔgɔ baŋa ni ba ganɪ nɔɔna. Vwa-nyina bam kɔntɔ maa ba sɛ ni Zezi Kriɪi jigi nabiinu mu o ba lɔgɔ baŋa. Nɔɔnɔ wɔlɔ nan na te kɔntɔ tɪn yi vwa-nyim mu, yi o yi Zezi Kriɪi dɪm mu. <sup>8</sup> Kɔntɔ ŋwaani, á fɔgi á ci á titi, sɪ á na tɔŋi kɔlɔ Wɛ ŋwaani tɪn yi zaŋi kɔ ji kafe, sɪ á wani á na ŋwiuru tɪlɔ maama Wɛ na wó pa abam tɪn.

<sup>9</sup> Taá ye-na ni, nɔɔnɔ wɔlɔ maama na yaŋi Zezi Kriɪi zaasim dɪm yi o daari o bri wəənu tidonnə o wəli da tɪn, Wɛ təri kɔntɔ tu tee ni. Kɔ daari, nɔɔnɔ wɔlɔ nan na sɛ o tɔgi Zezi zaasim dɪm tɪn, dí Ko Wɛ dɪ Dɪ Bu wɔm wɔra dɪ kɔntɔ tu. <sup>10</sup> Kɔntɔ, nɔɔnɔ na tu abam te, yi o zaasim dɪm na dai Zezi Kriɪi nyim dɪm, á yi sɛ á pa o zɔ á sam. Nan bri á yi zaan-o dɪ. <sup>11</sup> Nɔɔnɔ wɔlɔ na zaan-o tɪn, kɔntɔ tu dɪ tɔgi o wəli o kəmbalwaaru tɪm wɔni mu.

<sup>12</sup> Amu ya jigi wəənu zanzan sɪ a ta a bri abam. A nan ba laŋi sɪ a pɔpɔni a ki tɔnɔ ni. A nan bɔŋi ni, aá ba abam te sɪ a laan ŋɔɔni dɪdaani abam jaja, sɪ kɔ pa dɪbam wɔpolo kɔm tiini kɔ gaali.

<sup>13</sup> Dɪbam balɔ na yi nmɔ curɔ biə yi Wɛ kuri dɪbam dɪ tɪn mu jɔɔni nmɔ.

## **Wε Tɔno dɪ kasum**

### **Kasem (Kassem): Wε Tɔno dɪ kasum New Testament**

copyright © 1997 Wycliffe Bible Translators, Inc.

Language: (Kasem)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 22 Feb 2024 from source files dated 29 Jan 2022

993cfae5-b100-5981-87e7-5a648d773cb9